

白
榆
集

白榆集卷之二

東海屠隆緯真著

七言古詩

荆堂篇寄壽程母戚晚邵太夫人六十

荆堂卜築荆山椒華棖繡棟人煙霄堂下兒孫萃五
樹堂上太母栽金翹太母之胄本戚晚錢唐王氣通
靈潮祖姑惠后孕龍種實啓神孫承大統父祀
內託枌房親金吾緹綺荷榮寵太母擇嫁程長君淑
女徵蘭叶嘉夢長君義俠鳴夷儔千金聚散如輕漚

往來行賈結豪俊布衣聲聞傾王侯雨香南國花塵
履雪滿東吳笠澤舟太母溫溫性婉嫕玉葉金枝不
自貴口吟樛木逮庶姬身著浣裙飾良姊有子奕奕
稱三荆絡秀千載同榮名卽今六十開壽燕華燭高
照舞衣明天酒傾來泛兕爵雲謠譜入和龍笙知母
舊隸西王籍我亦清都守厠客仙郎愛我清霞言遠
託鸞書奏瑤席願毋駐景留朱顏羅郁相傳煉金液

露觴祠

六月炎燭遵彼湖曲日之夕矣女也野宿有蚊如雷

利於鏃天生萬物蚊何爲乎彼蚊其何知乃嗜貞女
膚他人有帷帳嫂入女也止帷帳而生不如野死肝
嗟乎女筋可露女行不可汚湖風蕭蕭古祠暮

西泠歌贈陸君策

西泠橋上月光滿斷虹垂天水痕淺曲岸橫塘秋
清菱葉荷花莫風緩疊嶂層巒四面來丹霞碧洞悠
中開天寒大寺霜鐘急野曠孤舟鐵笛哀花塢素沙
銜竹戶往往人家湖上住水仙龍女夜深出雜佩
翹踏沙去雲間陸生神氣澄青崖雙足扶蒼藤蒼威

才華奪南國經年蹤跡多西冷聞道卿家峰泖秀辟
羅無情挂虛牖一自車橋借馬蹄無數秋花生鵲首
竈吐茶煙濕水雲風和琴響增山溜問君終占第幾
峰我亦來巢鶴上松卽令漁父猶迷路縱是樵人亦
偶逢

容膝軒爲喻邦相賦

美人爲政多徜徉神情散朗游混茫湖上來乘青雀
舫山中故有白雲房冷風肅肅生虛牖涼月穆穆滿
石牀憐君高才宦不達十年作吏理星霜金華山中

松子大西泠橋下荷花香萬里久淹仙署客一官長
治水雲鄉却憶青山長蘿薜蕭洒高齋可容膝香爐
茗椀宿有緣松桂獼猴黯無色在世常懷出世心夢
入煙霞尋不得

讀蕭諫議使琉球錄歌

天王威德行荒服萬里遣使波臣國人生蹈海良歎
難行者惴惴填魚腹一出都門成歎別反顧安得不
踣躅事不避難臣子情公也掀髯慷慨行十行雷電
衝天詔六傳風雲擁使旌親朋送哭衢路道旁觀

者如堵城飄然乘舟泛溟渤長帆插天雪色明蛟龍
抱珠海若卧金鰲不動水惟清遠山數點抹青黛萬
里無波一鏡平須臾惡風捲地起濁浪洪濤急且駛
二儀簸蕩日月昏萬惟千靈吼海底長年三老覓亦
奪舟中之人慟不止公也鯉蜃視神龍冠服端坐蓬
牕中達生委命了不恐澄心定氣澹若空萬死間關
達海岸終成嘉禮宣皇風君不見韓嫣金丸行廣陌
都尉新聲被恩澤子卿雪窖十九年持節歸來頭盡
白又不見班超校筆何昂藏萬里遠使黃沙場輕將

性命飼豺虎玉關人老悲星霜蕭公磊砢亦如此報
國孤忠久自矢舢艫遠涉鯨鯢鄉當時一身榆葉耳
烈士古來多苦心安能全軀保妻子

送趙蕪父侍御請告還金華

石梁仙人桃花色酷好煙霞已成癖朝種河陽縣裏
花暮栽御史庭中栢乍可宮雲下珮環無端山月縈
蘿薜飄然便出春明門言借青谿煮白石誰道金華
牧羊兒却是長安驄馬客長松倒挂絕壁陰洞門雙
闌張玉琴石牀蒼苔積來厚天寒黃葉飛滿林山人

一別六七載鳥啼猿嘯總關心尋僧不憚雪霜冷采
芝豈知雲霧深君今暫得歸洞府野風蕭蕭聞猛虎
差疆馬上聽朝雞長樂鐘殘月華此此行未許卧丹
丘還與君王行繡斧他年相約訪赤松結廬欲選最
高峰胡麻沆漚時時有白鹿青羊處處逢

邵伯湖

大湖茫茫十萬頃日夜乾坤浸溟濤天風下來洪波
起觸石排空一何猛百靈奔迫雷雨聲六合搖動山
河影赤縣神州莽不見慘澹孤懸白日冷造化元氣

不壅關何得乃爾勢飄忽不獨惡風能作濤簸弄亦
恐馮神物卽看鳬鴈愁砑冑獨有魚龍愛空濶劈天
千尺帆檣過亂峰一抹煙霧多漢女遭之亦解珮洛
神那敢嬌凌波咫尺東南恐浮去突兀孤城將奈何
風濤快哉足容與人生險絕亦應睹老龍吹笛鼙鼓
琴高大嘯馮夷舞一杯一曲送斜陽雙槳雙帆進
前浦長天隱約見楊州海上紅霞月光吐

寄瞿生甲

瞿生十三誦古文抱書北走叩九關歷抵王侯無所

言但言有父離煩冤少年早已破萬卷西京大曆相
吐吞向客慷慨一何烈試以文章風雨奔語罷青天
白日淡對之四座驚心魂予也一見呼小友斗間夜
氣雙龍吼長才健筆高摩空短袖單衫不掩肘諸君
聞之徒歎息竝馬來過窮巷窄眼看瞿生落彩毫一
一盡作青霞色聲名頃刻滿燕都但願生兒如此雛
此雛生來丹穴鳳有父況是南海珠積毀煩冤近已
雪歸去荆門弄煙月涕淚還含千古情風塵已是三
年別洞庭魚龍黯欲收吟殘帝子蒼梧秋神劍飄零

有時合且題尺牘慰離愁

柳上澄照寺作

有序

柳上澄照寺逢鏡上人談禪至夜半忽聞門外蕩
槳聲問之則故人施可嘉莫廷韓徐長孺楊爾傳
見尋爲之清言達曙矣作此留山中

煙濤茫茫最深處却有山僧水中住寺門亂石不通
橋落日殘鐘在枯樹作吏余懷出世心偶逢慧遠話
東林沙明月上天初霽經罷香銷夜欲沉眠鷗忽起
大波響門外何人蕩雙槳乃是故人抱素琴夜半來

尋煙水深山僧煮茶佐名理雞鳴水中天已曙可惜
都無沽酒處爲愛煙雲不能去

李之文落第詩以慰之

我家賢甥酷似舅年少風流迥絕塵詩情酒德太不
淺狂來便擲頭上巾六尺侏儒髮復短居然上帝之
弄臣去年上書不得意今年雄文復見棄不見汝舅
坎廩時鷓鴣無光古花碎丈夫得失多偶然時來拂
袖行青天時苟不來爾將奈詩酒可以銷華年胡姬
壚頭足簫管夜闌燈長歌復緩曲房朱絲亦快人只

是能令鬚髮短不如學道守清真焚香讀書見古人
抱才如子真堪貴家有名田況不貧

贈伯英諸孫

公卿昔事 先皇帝弘正之間說襄惠一爲御史坐
烏臺數轉尚書開甲第長髯玉貌儼天人步出朝班
羨 至尊博大溫然號長者天下饑寒盡在門待臣
舉火詎三百或稱假子乞恩澤人以告公公不嗔呼
來賞酒賜顏色看汝狀貌知可兒我爲爾翁即亦得
天才滌逸奔巨波興酣對客揮長歌終身不識橫眉

事衮衣玉帶當婆娑盛德高門本天道今來孫子何其多諸孫伯英更瑀玖作詩工文兼善酒二十人稱混沌翁百年一醉無何有我昔閑垂東海綸伯英相隨情最厚自從作吏五湖旁却馳春夢三江口君來視我平原村大策入門冬月溫半壁殘燈濕寒雨遠林黃葉照青尊叩以新詩殊可誦不忝風流太宰孫君不見古來大臣傷刻薄身後子孫何寂寞

唁和叔

嗟和叔爾勿呼天踏地向人哭且縱飲我牀頭之濁

醪聽我清言叩哀王樂生今死灰燕王喚不回蝦蟆
盤跚是龍驤寶刀磨滅生青苔世上兒童若解事古
來不說荆人哀君家朱門高碧瓦一朝歌鐘寂如啞
門前楊柳空插天坐使他人來繫馬天生爾才良有
因豈使王孫終賤貧百年熬蘗堪充口七尺芙蓉不
避人磊落胷中罩今古俛首寧愁無阿堵君不見洞
庭雙鬟牧雨工蛾眉慘淡泣龍女神物失意亦如此
男兒有懷那得吐留取兩行青血痕灑向鮑叔千秋
墓前土

元夕集王使君宅觀燈

郡城元夕天雨雪萬戶笙歌鬱不發陽春只在王公
家複閣重檐何截鼻高燒火樹亂疎星滿院華燈代
明月交情三歲直忘年此夕登君玳瑁筵雨雪故應
欺客鬢蟾蜍知是爲君圓茵萑臨池水光瀉縱有春
風吹不謝使君况是挾天才儘多佳句酬良夜落筆
頃刻百韻成一盡作金石聲昔聞瀟灑宋司業甲
第花燈與天接司業去後蠟炬殘園裏寒霜照黃葉
人生如此不用哀與君一日觀燈當一廻

贈文長諸孫

當時笑拍洪厓肩我髮垂垂君少年芳草平沙江上
鴈桃花落日渡頭船自從先生逐五斗老去門前數
株柳君到高空春燭紅共說西風別來久鬢邊白雪
漸欺人江上青山無恙不看君談笑似當時往往能
工大曆詩聞道江花爛如錦相期歸作平原飲興至
休停琥珀杯醉來便拂珊瑚枕

贈李之芳

人言似舅卽賢甥萬葉王孫世雙美往往海內傳之

久風韻如今說小李度曲吹笙妙入神却疑子晉是
前身亦有嘉言霏玉雪春山朗映空潭月木蘭雙槳
報君來却遇衙齋花正開微辭調笑儘瀟灑袖出瑤
華日盈把懶聽河陽縣裏鶯春風欲試垂楊馬我亦
將行君暫留與君爛醉櫻桃下

贈崑崙山人遊天台訪顧益卿使君

嗟哉崑崙生布衣輕王侯胸中有五嶽筆底無千秋
世上浮名不挂齒馬蹄半踏空山裏醉來白眼傲青
天颯颯松風入雙耳只今作者紛如雲英雄立名多

未真讀君之詩見標格泠泠水石清無塵王屋義興
賴吐氣令予未敢輕山人往來踪跡遍吳越更言欲
問桃源津但使昂藏雙足快寧辭落拓一身貧顧侯
胡公俱倜儻生平大義白日朗一葬歿友吳門下却
尋知己天台上天台石梁海面垂海風日日來相吹
千樹萬樹絳桃發洞裏仙人愛賦詩遙想胡麻初飯
罷狂歌浩蕩把青芝

贈方衆父

青谿之水青如苔杏花落盡辛夷開堂上正逢春酒

熟門前忽報故人來美酒旣十千故人亦三五鐘沉
碧海天半昏城映紅霞月初吐鷄啼吏散燭影中高
齋坐來河漢空手驅白雲到蘭漿便令滿座生春風
諸君總是煙霞骨方生名理復不乏他年相約華陽
顛洞口松蘿儘堪結旣尋雙樹乞真言并向五龍傳
睡法而今且自混風塵此物終屬英雄人

贈陳道醇

陳生侏儒不足數骨相么麼氣食虎前身上帝之弄
臣香案前頭歌且舞羣真粲然啓玉齒天門散花笑

諸女偶騎黃鵠離瑤京下來人喚東方生看君聰明
真絕世談仙說佛往往精近與異人傳要眇乘風同
試蘇門嘯雲暝松陰後獨栖月白天空鶴雙叫嗟予
作吏營丹砂與君有分卧青霞何處英雄是退步相
逢不用問桃花

贈張長輿

吳王霸氣開東吳山川北走雄太湖茫茫三萬六千
頃洪濤硤擊青天孤黃浦入海連蓬壺人文往往秀
振蘆雙龍歟去海水枯楊侯夜出沙鳥呼元氣翕蕩

野草蘇後來精靈無代無卽今復見張長輿才名東
髮天壤俱五嶽四瀆盡向毫端趨我昔漁釣東海隅
讀君之詩美且都思君望君不異紅珊瑚一見把臂
同踟躕酒酣睥睨空萬夫振衣大嘯心神麤天風況
復來相扶雄豪千載歸吾徒君不見吳王劍石白日
徂至今古血青糲糊

王介峰爲其友人崑泉居士索詩輒爲賦之
玉君自是煙霞客風骨稜稜雙眼碧修真半百棄諸
生青蘿掩門拒大石閑房坐卧虎亦守深山采芝人

不識更言道友老巖泉林扉結伴經多年手持緗素
道名字向余乞取瑤華篇余乃風塵人勉作煙霞語
古洞靈源出神漢深松倒挂多仙鼠王君勝氣亦勝
情廿年自愛空山行獨放此人叩林屋王君策杖長
相迎更無鄰舍分煙火只有林猿聞嘯聲

山中吟

我家海上之青山山頭白雲時往還藤梢細月行花
裏水濺空巖酒竹間仙源有路春長入石屋無門夜
不關踏花只共野人語蕩槩真如沙鳥閑自從奔走

江南道馬蹄半入紅塵老生平耳目非我有俯仰眉
嫵向人好歲月其如石火何却逐浮名喪至寶昨夢
丘中人題書寄深省旣報青山空復言白雲冷山空
雲冷胡不歸荒後叫破秋天暝四明迴合無風塵入
牕高敞開星辰洞簫泠泠響空碧凌風一喚樊夫人
樊夫人偕雲華不知何年栖紫霞十洲三島俱爲家
粲然忽啓玉齒笑笑我不歸寂莫羞桃花桃花爛熳
紅映天垂楊婀娜春風前野麝亂飲幽澗水仙風倒
挂洞門煙偶因騎馬衝泥去憶得鋪花掃石眠

題范太僕天平山圖

太僕先生文正孫青山結伴遊吳門文正雖亡靈氣
在高墳磊落枕山根太僕不忘桑梓地歲時來自平
原村墳前酌酒蒼蒼石落日登山望秋色崖撐樹樹
蘸湖青雨洗峯峯插天碧亂雲飛去茅屋孤空林無
人啼鳥寂先生策杖凌高丘竹外花間事事幽仍驅
此山入筆研誰當畫者顧虎頭煙霞片片如可拾墨
氣淋漓點不收我本山中麋鹿性何時共踏青松逕
石湖無風水如鏡

虎頭孫子歌贈顧仲方秘書

虎頭孫子顧仲方意態蕭閑風骨蒼輿到我詩灑然
雪有時落筆寫林塘花前玉缸亂壺矢醉後雲煙忽
滿紙令我對之心茫然如在千巖萬壑裏江南脩竹
多名園顧君好客如平原開棹朝泛湖雨歇桃笙夜
奏山溜喧竭來日日侍金華揮毫染翰爛明霞長安
遂比兩都貴夫子猶將三絕誇入隨鳳輦斗花映
出傍龍池萬柳斜歸來開尊宴佳客官燕飛盡啼城
鷗與君吳門本舊識今日燕臺復相驪秋風吹人秋

扇裏八月天寒露華白流光如此可奈何一曲銅鞮
酒一石

赤帝玄夷歌贈黃白仲

赤帝玄夷授神禹九州茫茫入疆理奇形寶鼎知神
姦玉札金書藏宛委越王勾踐提風雷壯士臨江羽
騎開天插石帆春樹擁雪崩羅剎暮濤哀錢塘蘇小
油碧車夷光明妝行浣沙香銷南國畱江草土蝕西
陵空幕花伯圖王氣遙相送秀色娥眉亦何用千秋
英爽歸人文才子金看黃白仲白仲才何高華秋水

澄其波芙蓉揚其葩長松千尺壓巨石飛瀑百道灑
明霞去年杖策遊吳會淋漓彩毫空六代憑陵酒家
殊未央睥睨侯王太無賴狂呼踏土謝公墩大江疎
雨斜陽外今年慷慨尋燕江風沙茫茫四望愁昭王
死去古臺冷馬骨千金棄不收時清豪士無所用惟
有醉卧胡姬樓余亦低眉在閑局繡澁刀環野苔綠
曼倩金門終玩世子雲玄草未諧俗馬蹄嘖啖何爲
手與君放浪琴與筑漁陽三搗梁州一曲青天爲低
白日不速斗斜河轉明月盡請君登堂剪紅燭

寄左司馬汪伯玉先生

上帝之居何陡絕雕窓繡柱金爲闌桂旗芝蓋光有
無白雲成削紅雲結日月不照雷霆低飗風吹冷天
門裂中有靈人掌香案綵筆淋漓走飛電校書夜直
寥陽宮草詔晨登鬱蕭殿偶然騎龍下清都仙才霞
氣掣瓊琚金箱大嶽玄夷錄玉版名山委宛書鎖羊
赤鵲神靈識海鳧龍鮓玄鑒虛片片春山林青黛冷
冷秋水嬌紅蕖文章劈海破高浪勲名復在雲臺上
司馬英雄治五兵黃石素書天莽蕩朔雪斧刀擁建

牙胡風代馬親乘障身兼數器驅寰中眼前君與瑯
琊公千秋名成髮漸短七尺氣在心轉空條然訪道
襄城去一日竹杖凌煙虹

贈龍君善

洞庭龍子矜國色秋水芙蓉照天碧涇陽小兒太無
良坐使靈人委芳澤落日浦口來牧羊巾袖慘澹波
臣慄江花野草俱含情露鬢風鬟啼不得君本高才
美丰神衛家叔寶傾都人不作昂藏虎觀客却令握
齒馬蹄塵去年相見清谿曲水盡天空飛屬玉青翰

舟中采射干白鷗沙上醉醺醺今年復遇燕市旁
頭月出天蒼茫英雄結交在意氣腰間靖看雙魚腸
秋夜同郭舜舉蔡伯華王季孺金玄朗詹政叔
燕萬伯修宅聽李金吾彈琵琶

城烏啞啞起暮色秋煙捲盡寒河白銀鞍寶馬大道
平夜醉雲中豪士宅雲中豪士生窮邊空城罷馬無
人煙疾風長逐狐兔走大雪獨擁弓刀眠結髮獻入
焉支陣撻金伐鼓彈鴟絃中年釋褐在禁闥雄心不
除氣逾烈頭上千秋壯士冠胸中一斗英雄血家僮

盡解隴上歌有時自按伊州闕
雁雞膾鯉羅碑礫客來總是荆
高徒醉試騰裝插羽箭狂呼擊
劍連長安疎星乍低紫匳匝華
燭斜映紅氍毹須臾金吾理新
曲調絃移柱風簌簌滿堂賓客不
敢喧野曠天高絕沙漠一再落
指何泠泠輕霞細月入窅冥瑤臺
神女凌空度桂旗芝蓋從羣靈碧
雲無聲杳然去松頂天風墮鶴翎
忽然急節響鏗鏘萬馬千兵行
颯沓殆悲鼓咽虜氣陰日落沙昏
陣門合臂地蕭閒神氣夷淙淙澗
水流迴谿青樓小婦作情語欲吐
不吐整衣籠

無端更寫千秋恨却似明妃初嫁啼人生何物稱快
意昂藏不減丈夫氣除却雲臺立大功便從石室書
名字不然花前有玉缸爛醉彈絃倚豪士安能局促
五侯門低首攢眉向天地

排空歌贈余宗漢山人

君不見天漢西轉黃河東流四時寒暑遞相送五星
日月奔不休岫巒崆峒精光磨滅亦已久玄夷白澤
靈怪茫昧而難求又不見北邙之陽西陵之陰喪車
朝出歌鐘夕沉香澤去體螻蟻來侵牛羊不識玉侯

賢斜煙疎雨鬼隴林丈夫眼中一斗淚此時不聽雍
門琴余夫子少年負斯馳雙目營千秋一官困百里
感此何茫然寒灰寸心灰車耳虎子安用爲一朝挂
冠稱處士放浪湖海莊無涯浮生到處乘枯槎口吞
采石磯頭月足踏蓬萊峰頂霞彩毫南國書題遍爛
醉長干卧酒家去年大料黃山上聲谷天風萬松響
不衫不履驚市人識者云是全椒長今年悲歌蘇州
來淖池易水濺濺哀四顧無人野煙白仰天慟哭昭
王臺華屋朱門不一時五侯七貴如浮埃散髮委人

西山裏目掃黃葉眠蒼苔吁嗟乎人生迫近苦網羅
跳身物外堪婆娑以君昂藏凌雲氣聽余磊落排空
歌相期天門躡飛電下視海水揚白波下視海水揚
白波雖有紅塵奈爾何

題李龍眠畫十八學士圖

太原將種自真主龍顏秀異氣食虎英雄莽蕩扶日
月嶽瀆精靈走風雨當時磊塊十八人一收來天
冊府紅雲紫氣浮咸陽繡柱珠簾開玉堂秦王不時
賜清燕諸公暇日多徜徉堂上伶人進鼓樂堂下稚

子羅酒漿彈碁六博神仙戲瑩後阮咸海濤沸狂呼
蟬飲郇公厨異品甘香大官味須臾內侍出瑀盤雪
騁紅梨雜丹荔諸公睥睨空河山一翁酩酊喪天地
更有散步涼風前息影幽棲大樹邊似是有官心不
樂山林之韻何蕭然高梧垂楊冷陰合門外馬蹄何
難沓草色青青大道平荷香冉冉清池匝當場授簡
各自誇袖中爭握白榆花兒童厮養饒樂事偷彈座
上雙琵琶一片壺水世希有名字南箕與北斗文章
不乏揆天才廊廟還輸經國手入排金闥獻密謀退

坐玉堂飲名酒丈夫時來則如此天際浮雲爾何有
華屋高蓋人所賢蓬累終身亦不醜龍眠居士龍爲
徒落筆矯矯煙模餉點染不數閤立本我披肅肅神
氣俱旁人盡道神仙客爲仙不足官有餘嗚呼我欲
喚起老居士爲我再寫一幅四皓商山圖

石雪山人歌寄贈汪長文

石雪山人太高潔碧山無雲石如雪撐崖鑿室青天
陰路挿天門開陟絕朝曦暮靄非一狀盡取千峰作
屏障海月倒挂大雷西石橙斜盤四明上表裳夜染

空翠濕曉日登樓亂煙入門前飛霞真可餐
竈下流泉不用汲山花斑斑映綠萸
樵蘿曲曲抱青谿經年人跡往來斷
惟有荒猿春夏啼山人屢月不出山
自言學得五龍眠白髻鬚眉朗可數
隱囊紗帽何飄然有時閑踏雪峰去
人道逍遙鶴上仙更尋丹檢玉笥
語深入靈巖捫洞府風吹空穴窺玄
熊月黑長林過蒼虎實田谷口耕胡
麻當閑繞舍種桃花散髮追涼坐河
漢采芝歌罷驚煙霞高人體氣清絕
有如此使我低頭浩歎悲年華

寄贈楊伯翼

四明山中多異人楊家伯翼稱絕倫口吐清池玉齒
舊身是上界金麒麟少時相見卽相好雙龍颯颯如
有神青天共蕩木蘭槳碧波不動桃花津自從束帶
趨簿領一別江沙白鷗冷偶讀南華浩蕩言頗傷石
火須臾影豈有河陽潘令花浪說丹砂葛洪并楊生
笑我塵沙裏那得便領煙霞境饒他五陵八百人且
占太湖三萬頃楊生楊生磊落姿相思不異瑤樹枝
久向名山藏姓字每于朗月見風期但使有心修白

興甚愁無地種青芝

青霞山人歌爲王受吾

青霞山人清若冰山空霞起朝爽澄文藻翩翩秀五
色多才往往人嗟稱博物好古總奇絕四十意氣何
拔競夜捫吳劒山雲黑曉讀秦碑海日升毫端妙手
如生獻畫裏新詩壓右丞長安不聞天子呼酖醺只
醉黃公壚前年北邊飲酥酪去年南海探珊瑚千峰
半踏馬蹄裂百壺欲吸海水枯歸來不住青山宅翻
然復作五湖客江月湖煙亂入船落日無人晚天碧

與余相見宿所詣入門放杖脫芒鞋不取雕龍笺
理止留繡佛伴清齋吾今心已在煙霞五嶺三山總
是家萬事君應付寥廓一官吾自悲年華門前綠竹
堪銷暑池上紅蓮欲吐花

于燕芳年二十以布衣上書自稱華亭民余讀
未竟色動亟命召入相見信有正平之才索
予以長牋荅之不許復索長歌又不許無何
折節閉門讀書不與外事者三年余聞而作
此贈之

于生二十才嶙峋芒鞋布帽行風塵手握靈蛇動光
恠上書自稱華亭民有才不減稱處士登堂長揖驚
奴賓禮貌陳野氣豪逸今君大喜門吏嗔漁陽撻撻
真絕調捉刀那有牀頭人于生于生太骯髒讀君之
文高破浪瘦馬稜稜在骨奇世人齷齪多皮相聞君
折節方下帷竹房山路回風吹請看黃石橋邊樹莫
問淮陰市上兒

留別元美先生

王夫子棄官學道如長史秀骨朱顏編貝齒姓名久

注上清籍人間驚濤風塵耳少年綵筆亦太橫
驚雷一何駛出語穿天心蟠曾絕地紀平生那得有
不知磔裂元氣鴻蒙死力掃千古把一麾不是仙才
寧有此一領瑤札從雲華眼前萬事如空花楚楚星
冠與雲履飲以天酒飯胡麻夜來笙簧滿空碧羣真
携汝宴茅家茅家三君各治一峰上汝亦有弟耽煙
霞羨君鶴駕終排霧笑我馬蹄空踏沙踏沙去去雲
霜重落日荒荒大雲凍朝向紅塵行暮作青山夢人
生性命不自了鐘鼎浮名亦何用赤松雲房知我心

定須訪爾華陽洞

南滁大雪歌

昨日何日故人一尊虎丘月今日何日馬頭十丈南
滁雪昨日何日金陵管絃喧酒家今日何日關山石
裂穿寒沙從來雨雪多江北回首江南淚沾臆所以
古人惜河梁昨日之尊那可得西風太有權濁酒都
無力冷如鬼手捉馬鞭狐裘蒙茸亦何益寒山日落
牛羊眠往往茅屋見人煙茅屋人家絕可憐黃茅貼
出青松巔自住山上屋還耕山下田童子撈魚谿水

讀之斐然惛伏三讀之竟魂爲漌漌兔朗若蹈虛空
而翔冥極嗟乎玄珠喫詬離朱之所不能得而董君
得之溘而夕死固可無恨余又聞君賦將成遂感興
夢信也詎有此道而不通神靈者哉昔長卿賦出帝
乃出不同時大冲一當皇甫君言都下遂爲紙貴余
旣賞君才而又嘆君之不遇雖然以俟千秋萬歲可
也

白榆集卷之三

東海屠隆緯真著

七言古詩二

公子行贈宋西寧忠甫

邯鄲雕牕結文綺上客從容躡珠履何物盤跚複道
行當樓一笑美人歿大梁錦席登華軒公子自起迎
夷門路傍劒客願刎頸宮中娥眉解報恩易水壯士
偶一言金盃擎出玉臂寒仰天氣觸白虹走徐姬七
首血不乾淮南好文復好道人公風霜挾鴻寶雲中

雞犬去不回藥竈空存桂花老西園飛蓋引應劉高
臺置酒彈箏篴彩毫煌煌照千古鄴都零落漳河流
邇來一一推王孫圖書滿架生灰塵歌姬變童閉門
坐布衣投刺典謁嗔梁肉但飽廝養卒結交那有賢
豪人華轂朱輪紫駟馬出入輝光驚四鄰眼中西寧
差快意玉帶貂蟬誇早貴二十秀雅如諸生翩翩大
有凌雲氣稱詩作賦耽典墳好客留賓開邸第田蚡
安肯容灌夫孟德猶能殺鼓吏狂生罵座君不知醉
看孤燭光淋漓長者寧辭親結褵貴人却乃羞低眉

大梁諸公死去久寥寥千載見風期

薊門行贈顧益卿使君

薊門日落大旗赭疾風捲蓬雪鋪野健兒夜走澤沲
冰寶刀血照蒲梢馬烏支慘澹牛羊稀胡人聚哭陰
山下使君行邊今李牧威名昔年著南國十萬樓船
清海恠長戟短兵風雨速一朝提劍驚西來父老關
前拜羽森牧馬匈奴畏近邊風煙不動壯士眠一自
龍堆卸金甲便從虎帳開瓊筵空霜地白暮天霽城
寒戍壘月痕細騰裝插羽下南樓急管哀弦復西第

粉面妖童歌十行鐵騎耽耽舞千隊揮毫自草箠篋
篇紅燭淋漓客皆醉白日難銷俠烈心黃雲不壓英
雄氣五陵三輔奔車輪幕下盡是賢豪人湯生茹生
自我輩宜城一石空千春若爲望去思瓊樹恨不同
來吐錦裯吁嗟乎薊丘崩頽樂毅死穀城荒涼黃石
逝廣武一歎秋雲駛紛紛成名徒豎子眼中英雄使
君耳丈夫出處何足言爲龍爲蛇亦偶然君今畱賻
終頭月余也歸耕海上田曾授靈書二十四昌蒲紫
花封洞天他年好待驂鸞鶴接汝嵩陽玉女巖

青谿道士吟留別京邑諸游好

青谿道士餐白石掃地焚香坐空碧月暎蒹葭秋水
寬雪覆枌櫨暮雲坼山深路僻無人煙沙冷天空留
虎跡可惜一朝不自堅來作清朝蘭省客烈日騎馬
掘堞中搔首乾坤嗟迫迮下筆連蜷雌蜺氣吐日天
矯丹霞色雄心不除俠骨存十年學道亦何益何物
美器橫相加藉藉聲滿長安陌長安大道連平沙王
侯戚里紛豪華銀臺畫閣三千尺繡箔珠樓十萬家
省郎卜居窮巷裏車馬趨之若流水爭設瓊筵借彩

毫朝入西園暮東邸。攜辭盡道李王孫。執轡皆稱魏
公子。主人轟飲醉向天。淋漓紅燭落花前。銀漢半斜
沉夜柝。繁霜歌罷彈哀弦。有客醒然不御酒。獨擁香
爐對暝煙。吁嗟乎美服人所指。器盈神理殃爲歡。尚
未畢。含沙已在旁。匹夫睚眦修七箸。惡聲信信安可
量。子蘭譴屈平。登徒毀宋玉。謂奏相如琴。未減淳于
燭。補生鼓吏慙未能。幼輿丘壑無不足。青天何高高。
白日去莽莽。出門眼看北邙山。令人萬事拋滌滌。玉
押珠襦寒雨中。金疊寶瑟高堂上。不聞黃鵠遊滄池。

豈有神龍挂魚網我欲掩口笑古人古人英雄亦不
遑子房亦松待興漢范蠡五湖須霸越卽如濛莊與
濯園安用雲臺懸日月馬蹄雞肋空有無欲休卽休
何所圖亦不用百官祖道集征虜亦不用君王詔書
賜鑑湖一騎蕭然下風雪空壕斜日啼城烏耻爲執
虎子寧待車生耳嬾視張儀舌不問待詔齒是非野
鶴騫孤霞恩怨金鴟擘海水脫我今日之紅塵還我
舊時之白雲王績罷官同坐酒介推身隱詎須文風
雷不能爲之驅陰陽不能爲之鑄胡鷹翻然掣金鎖

碧落茫茫墮秋霧銅馬當年悔陸沉自憐黑髮早抽簪
當門楊柳黏天碧繞屋松杉滿地陰故人他日如
相訪萬樹桃花何處尋

桃花嶺歌爲楊太宰賦

東華妙炁結溟滓扶桑直接蓬萊頂上有縹緲金銀
宮寒覆丹霞幾千頃海岱英靈產異人排空卜築桃
花嶺回峰盤盤磴道斜天窓石扇開谿谿煙光不斷
界飛瀑日色倒射含空沙黃栗留鳴紫麀出度嶺仙
桃萬樹花仙翁吹笙桃樹底流水長天散如綺舉塵

惟聞雞犬聲疑在清都白雲裏世緣未了三事催一
朝強爲蒼生起甦別羣直領百官斟酌元氣吹斗垣
海內黔黎總按堵天下豪傑皆彈冠長安兒童識司
馬澤國風雷避灌壇冰壺玉衡秋月朗致君直在黃
虞上然後歸耕東海雲繡嶺桃花尚無恙君不見子
房人中龍布衣取萬戶翻然訪赤松又不見鄴侯何
突兀朝披一品衣夜抱九僊骨我翁寬仁博大意豁
如混茫滄海涵太虛清德古來掩胡質長者寧獨稱
魏舒長髯玉貌天人表姓名定列丹臺書

送顏質卿舍人同詹政叔登泰山

大地奔騰元氣積岱宗崔嵬帝座逼千盤萬轉走紆
廻天門倒挂銀河側碧殿鐘聲落暗波扶桑夜半海
霞赤野草寒雲御路平七十二君留馬跡漢碣秦碑
盡莽蒼金匱玉牒無消息上界笙簫嶽帝聞桃花雞
犬住元君煙霞昏曉山川合雷雨陰晴天地分舍人
道炁羲皇上簷坐伎骨何骯髒兩君結束名山遊大
叫天風驚海浪靈書神物經千秋七首虹光高十丈
五松涼泠暮濤哀龍鱗剝落空蒼苔鉅野瀟條散青

靈使人對此雄心灰我昔自署宣寥子奈何風塵困
燕市絨題曾寄摩崖石波臣動色山靈喜卽今胡鷹
掣鎖來布襪芒鞋行萬里早晚携筑到上頭尚平五
嶽從茲始

贈謝仲毓山人

雙鳬翩翩青谿濱後車之載多俊民自謂已傾江左
彥那得復有謝山人山人魴魚獨在後諸君豈是陽
鱗倫扁舟斗笠水潏潏煙濛濛不可索卽今相逢
逆旅間濁酒荒城暮寥廓伊余逸氣凌紫霓偶落黃

塵驅馬蹄身是石室金臺物名與青蓮賀監齊含香
娑娑在間局安能低眉老刺促燭短更長雁柱聲天
寒日落烏栖曲一朝挂冠歸水雲采石茫茫鑑湖綠
山人鬚眉何軒軒新詩秀絕清心寬入門把臂嗟何
晚北斗歷亂明星繁畏途吾喜抽身蚤青山獸抱煙
霞老汝本布衣在丘壑胡爲齷齪長安道歸來好及
春風前共躡金庭拾瑤草

贈別鍾公旦文學

潞河層冰野風烈日落空城暮飛雪寒燈濁酒四壁

孤餓鳥嘒嘒雁淒切何者美人被褐來入門月朗
天開長嘯懷中出片刺自言家主越王臺少年干時
不得意黃塵一道漁陽騎燕昭墓下十載栖督亢亭
前幾回醉逆旅相逢意氣真披肝各許賢豪人君舞
魚腸猶莽蒼我辭雞肋已沉淪看君雄才骨法好談
笑風雲致身早鳳吹低臨御路長龍旗高捲華清曉
四明狂客高陽徒長安十九臥酒壚一朝含沙起
罇詔許黃冠歸鑑湖二足揚帆五兩速春風吹空海
草綠故人他年倘見尋白浪湖舠暎修竹

題王諫議家畫五大山水歌

砥柱

真宰簸弄元氣奔天漢倒瀉崑崙翻洪流蕩潏礫六合鬼母夜哭神姦昏日月五星驚鄂跳不止妖蛟老龍擎雲攫雨而騰騫自從玄夷蒼水授金簡龍門一鑿開河源況復鉅靈擘大嶽石勢中斷高掌存建瓴激矢走溟渤欲旬滌秋林看無垠雍州百二壘空耳目光眩瞽推心鬼乃有一山突兀絕立水中似從天門閃爍乘陰陽霹靂而欽化砮崖削壁剗剛風波濤

四面撼其下有時黑雲黃霧罩六幕萬本號嘖香
冥栖鶻夜半數驚起神靈羽蓋不敢停忽然廖廓四
開朗孤峯露出搖晴沙頂吞皓月根盤丹霞鮫室嵌
瀕洞石扇浮谿舒瑤姬龍女杳然去水碧天青空岸
花吁嗟乎上帝豈好怪操蛇之神弄狡獪千秋安問
礪與帶中原變幻尚如此何況蓬萊五山瀛海外王
君盡此生綃中時時風雨響泮泮王君王君無乃自
爲其胸中之磊塊

洞庭

洞庭空濶浩彌彌元氣混茫不見底波濤怒挾天漢
流吞吐荆南六千里春風拍浪開桃花萬片帆檣疾
于矢但聞鳥啼猿嘯兩岸空霎時天地如鴻蒙其上
有巴陵黃鶴控巫峽樓臺掩扶摧天風仙人下來瑤
席冷綃衣玉佩朝霞紅竹杖青蛇望空舉綵雲西沒
橫蹒躑其下有水府深黑不可見乍有乍無光閃電
洞庭龍君珊瑚牀軒軒高坐凌虛殿武夫虬鬚氣若
雲嬌女風鬟淚如綫何人乘船吹鐵笛急節崩騰響
裂石轉入湘娥竇瑟聲月滿蘼蕪水浪碧令人對此

雄心降好着青天一釣艫我欲領取水雲十萬頃鵲
鵲屬玉飛滿窓

金山

大江滔滔流日夕控壓乾坤盡南北潮湧千帆瓜步
青雲連萬樹揚州白何來小山一點浮虛空吞江截
浪開瑤宮細路半壁生海月高窓四面來天風塵氛
杳然夏無暑靈境不與人世通岸圻沙崩大石走深
潭龍起奮鬣吼洪波欲捲孤峰去黑霧黯霍亦何有
須臾天朗青黛出歷歷松杉抱寒溜老僧禪房都不

局藤花倒垂煙巒冥挂衲猶畏鶴巢冷洗鉢似嫌漁
浦腥日暮踈鐘度空水談經說法龍女聽吁嗟乎長
安紅塵高十丈吾已拂衣游澹蕩埋憂地下寄愁天
上好携雞犬住此山興到乘船踏高浪

錢塘

羅刹江深萬波集兩峰橫東海門急八月銀山雪屋
來陽侯辟易天吳泣高城欲捲大地浮餘沫直濺青
冥濕鴟夷白馬夜濤中鰲身倒翻列炬紅却如疾雷
砰轟破山嶽五丁六甲雲旗獵獵火滿空又如水犀

強弩大戰乎江上萬面疊鼓聲
軍逢逢吳兒弄潮凌
測出沒來往若梭織豈是神人鞭石足踏鼉鼉梁天地
浮生輕一擲萬家井竈帶西陵白骨寒沙勾踐營昔
雄圖悵何在隔江斜月斷霞橫無恙布帆白如雪行
人送盡暮潮聲淘洗千古英雄氣濁酒漁歌一葦輕

灩澦

巴江挂天大雷吼石轉沙迴急峽走白虹萬道斷復
續偃樹垂蘿厓壁陡天寒水落象馬堆怒濤噴薄松
聲哀兩岸羣山不留睫孤帆擘空如箭來煙棧冥冥

沒鳥羽龍氣吹波晝多雨朗夜高江涼月奔峽女嬌
花碧霞舉輕舟浩蕩凌大荒榜人擊汰復鳴榔日冷
青楓天際坐叢薄蕭蕭猿叫霜估客迴沿浦口宿水
痕斜對廟門一短衫窄袖隔蓬窗莫唱青谿小姑娘
蜀道巴江險口天下無安能千金抵一壺西冷若耶
如鏡鋪畫橋游舫連城隅歸來芳清尊嫋嫋開紅蕖
潞河贈別蔡參軍孺觀

君不見五斗學士號醉鄉日給美醞供徜徉白眼睥
睨輕侯王翻然挂冠坐酒過東臯歸去弄斜陽又不

見青蓮逸氣橫高秋花牋彩毫金殿頭十一直華清
十九卧酒樓內侍宮中成貝錦片帆一日凌滄洲我
亦爲郎性落拓早罷含香問丘壑關河凍合阻行舟
積雪寒雲下城郭感君此地結綢繆手挈玉壺慰離
索故園啼鳩嬌春風歸家正及櫻桃紅布襪沙晴見
麋鹿蘭橈水暖衝鴛鴻回首故人在遠道迢遞相思
寄芳草藥裹關心萬事慵斲琴剗木蒼山老

顧朗生江左名流與余彼此相慕悅有年未嘗
結託余在燕京座客常滿時朗生亦客京師絕

不相見比余被讒挂冠東去發舟潞河朗生提
壺策蹇遠送河干且手出五詩贈別余感其高
義賦長歌以贈之

余昔譚秣華陽館繡虎雕龍履綦滿出聯寶騎青絲
長坐滅星河紅燭短布帽金貂總在門各吐肝腸鮑
與管一朝投効謝朝雞尊空客散煙霜淒寒生襪被
荒城暮獨宿孤帆野水西感君相送意何厚走馬提
壺來浦口已欽高義凌雲霄更出新詩若瓊玖微雨
纔清廣陌塵春風漸入河橋柳躊躇宛轉情無端令

人感歎平生歡世人並只趨蘭省君獨何爲問鑲
聞君家近延陵廟余亦將買梁谿權男兒傾蓋在片
言何況彈琴本同調桃花雞犬作比隣朗月青天共
長嘯

留別萬伯修

長卿爲郎如曼倩閨轂虛聲走寓縣玩世混俗了不
營香爐綵筆金華殿四海望氣青雲高一夫含沙白
日變交游扼腕稱不平酌酒相勞涕泗橫神理忌盈
滿時俗妬大名乃有提章抗疏叫閭闔出門拔劍衝

冠纓壯哉公等自雄快無乃俱非曠士情自從海客
離三島洞門閒封白雲老牕中玉女怨桃花石上金
函冷瑤草似是山靈解喚人仙源猶自不迷津鶴背
竦身排紫霧馬頭揮手別紅塵風高三月黃河立大
帆細雨吹空濕落日煙消沙渚平迴塘水滿鷗鳥集
東南回首謝故人何處青天問斗筮

寄壽友翁

有別

友翁者余友衆甫之尊人也翁年六十萬曆十二
年正月十五乃其生朝衆甫時新拜冀州散歸而

稱觴

江南正月陽和回青天碧海無纖埃盈盈三五望
滿九衢絲管紛如雷何者一翁披鶴氅芙蓉之冠高
崔嵬仙人戲踏綵雲下遊女遙凌香霧來水綠燈光
映天酒雪消花氣吹瑤臺郎君拜官自丹陛五馬專
城詫新貴花前玉板按低箏門外朱輪羅小隊舞罷
踉進九霞觴親顏夜染絳桃醉好風徐度白雲謡翁
赫浮空千萬騎雲林書通許穆家萼綠親幸羊權第
滿堂賓客不敢喧聽君密授長生言

九疑篇贈周淑南

古來南國多英靈山川奔峭不得停波搖神女雙環
碧天人黃陵九朶青娉婷一去蒼梧冷月明時見袞
裳影啼妝有淚水竹斑斑無聲暮花暝九疑秀色
何龍從文章往往含芙蓉屈宋而下代不乏朗如皦
日照春松周郎二十工詞賦落筆盈盈花上露吟成
白雪三楚香奪得紅霞二妃妬曾向荆王臺上游荆
王臺下江水流汀蘭岸正應相識峽雨巫雲不可求
看君眉宇嬌淥水洞庭雲夢六千里峰巒曲曲盡可

疑朝光青青暮光紫文章變幻亦如此錢起湘靈從
此始

長安元夕聽武生吳歌

出不願金絡青絲踏垂柳入不願繡箔雕楹對虛牖
人生不聽武生歌百歲流年空飲酒武生眉撫橫春
雲石家櫻桃何足論千人楚調誰堪和一曲吳歛總
斷冤初疑絳河響流月再聽冷風舞迴雪欲換故遲
聲轉媚繁音已盡意不歇秦家公主吹欲低洞庭女
兒悲乍咽鴛鴦淥水浸明霞蜻蜒暮飛紅蓼花有時

娟娟入庭葉有時裊裊留空沙洛陽誤識金吾子片
言不合翻然起誰家王孫喚得來對酒當歌月華紫
生情生態世所無却令英雄寸心死武生莫惜宛轉
歌爲君大醉金叵羅朱顏皓齒今不樂白日黃河當
奈何

走筆荅董伯念膳部

長安小兒聲啞啞當街大笑蘭省客清眉瘦面肩若
山天寒衝泥委巷窄風高雪花大於手邊城蕭蕭亂
鐵黑油幕在首捉馬鞭仰視遙空凍欲坼人言畫省

爲仙郎寒林蕭疎風葉黃署中盡日煨榾柮布衾如
水澆藤牀鼠啣殘冰雀墮樹老鶴暮影與人長董生
有才郎寒玉相共淒清羌不俗一官雖冷興自佳不
廢焚香與燒燭長安馬蹄未爲貴安得與君在驢背
踏入梅花月輪碎

送鄒爾瞻給諫以言事左遷南比部

昔年批鱗氣昂藏間關萬里投南荒水霜裹血身不
死星虹抹劍貧無裝陰靈蔽天天恹澹鵲鵲晝出射
虎張時人爭欲借名字親朋那敢送河梁含沙吹水

瘴雲黑山鬼嘯月蠻煙黃頌史陵谷變墟并電滅花
飛雙泡影已拚白骨葬炎州誰道青春登華省香名
滿世服美官祥慶威鳳人所歎婆娑可以致大位離
憂無復挂眉端烈士由來心默苦寧能優游坐公府
夜半朝衣檢皂囊數進危言犯明主幾日僊郎玉
陞行一朝逐客金陵去金陵山川清且嘉六朝如夢
空煙花閉門掃石看雲起野寺焚香到日斜

送范國士侍御以言事免官歸商安

上帝高居鬱蕭殿天官女史列香案桂樹夾路守蛟

飈車橫空繞雷電丹霞翠霧護玉清羣靈罕得見
其何物小臣亦慙哉執書大叫天門開片言稜稜
搖岳瀆帝怒落職金銀臺君家舊住香爐頂瀑布
銀河挂秋影野色踈花碧洞虛聲聲殘月蒼煙冷從
容稽首下彤闈昨日繡服今布衣風高劒浦雙龍過
雲斷瑤空一鶴飛殿中神羊詎不貴安能卷舌絕聲
歎邇來豪傑多豫章曾君鄒君俱磊塊朝陽三鳳世
所希青史千秋定誰在

春夜集潘士遠宅

王孫結客傾都城并刀代馬獵胡纓粉面亂鬚氣颯
颯白日義重黃金輕雅量能容灌仲孺肝腸輸與田
先生春城置酒候花色午夜宮門月華直盤中時出
五侯鯖座上應多萬里客何人談碁稱國工少年擊
劒生雄風亦有按歌調絕俗更看作賦聲摩空爛熳
金波竹葉釀蒼茫汗血桃花驄六街無人月在手戲
擊天河撞北斗君爲布衣無不宜我視微官亦何有
紫煙滅盡夜轉佳杳如空山坐寒溜如此清暉不盡
歡明朝花落風雨寒

弄臣篇贈詹政叔

紅雲朋騰白雲走霹靂轟轟撞北斗闔闔天門夜不
關六丁蒼芒萬靈吼喧傳上帝失弄臣玉樓寂寞笑
女嗔大索三界不可得却在人世矚風塵頭顱輸與
魏公子戲笑親筆郭舍人偶乘馬蹄踏燕土使酒舞
賴氣食虎唾壺裂盡天地昏如意揮殘日月舞太醉
撻碎黃金臺長安市上觀如堵嗟弄臣一何雄俯吸
碧海仰截青虹儵忽千金到手盡模糊萬物入眼空
瞥爾論心有蜾蠃當其失意無王公人言骨相舍貧

賤不禁陽狂丘壑中世上束縛冠與履放爾沈湮自
栩栩王母遭之亦解頤三尺鉅靈應識汝

贈董伯念膳部

美人家在青谿曲朝飛倉庚暮屬玉月明衆壑杳然
空雨過羣峰澹如沐高低密葉暗山厨遠近踈花暎
茅屋玉洞長穿虎豹行石牀獨抱雲霞宿笑呼童子
採青芝親見仙人騎白鹿生來坐占谿山幽寒松修
竹風颼颼五色文心發靈籟千年秀句驚神州策罷
天人直華省長安嘖嘖稱琳球風神散朗氣豪逸攬

雨拏雲一何疾生平不受魏其嗔小小好與田光馳
出看廣陌飛紫驕入據曲房彈寶瑟花前潦倒金叵
羅座上淋漓銀不律與余相見卽相投各吐肝腸挂
白日世人心知良獨難九河二峽多波瀾君歌我舞
亦足快臭味何論椒與蘭年年解道朱顏改夜夜寧
辭紅燭殘

陸母太夫人壽歌

上元夫人朝玉京相期王母邀太清赤霜之袍紫霓
旌青童口吹白玉笙瑤姬玄女寶幢迎蹇來人世婆

娉行衣裳霞氣猶爛盈鍊炁服食餐雲英三度清淺
看蓬瀛吁嗟神母合有子有子今爲柱下史前身或
恐是李耳鄴侯風神待詔齒夫人今且住塵囂環珮
曾趨絳節朝名花寶月當生朝仙人來奏白雲謠朱
顏銀鬢宜春宵五花丹詔雙鳳翹夫人自有九霞綃
堂上阿母瑟初鼓階下郎君豸衣舞世上榮華盡不
數我欲爲君歌天姥

庚辰五月沈嘉則王百谷馮開之田叔見經

浦署作

王才參漢海氣黑癡龍倒卷天河并余等九關上帝
嘯疾風破山飛霹靂浩浩江湖不得奔手障百川泥
沒邾六尺小臣筋力疲四十頭顱半欲白故人念我
作吏苦同日相過同咄惜余病雖尪意氣麤便與雄
談開玉壺日射青天紫煙滅筆搯五嶽羣靈趨諸公
乘醉歌白紵大海况復來明珠吾鄉隱侯老祭酒布
衣蕭蕭雪盈首文章縛虎向南山名字騎龍踏北斗
近時天壤有王郎舌底縱橫繞電光落筆往往太綺
麗讀之能令牙齒香太史馮生炯雙睫笑對諸公睨

六合曾中藻思爛春雲頭上進賢等秋葉我家田叔
萬石儔近來亦復追風流自言浩蕩閭門下傍人飲
酒聽鉦篳四三曹偶大才子一到卿雲夜夜紫高言
逸氣動天文五星奔迫白日駛余也小吏悲陸沉歲
月無情毛髮侵低頭未免時人笑抗手能得英雄心
但使英雄獨憐我笑殺時人無不可

寄劉觀察先生

先生觀察浙中時
余受國士之知

君不見豐城劍歟夜雙龍吼歲月老去多泥沙積來
厚千秋不遇張司空空有精光干北斗又不見鑿下

桐一出烈火中清音滿天地不是中郎妙鑒賞煙塵
漫滅道旁棄男兒重知己拂拭開風神少年坎壈不
稱意夫子憐才一何真力驅春風吹枯草令我感激
思古人三年迢遞南中去炎徼蠻天沐煙霧萬死難
酬國士恩寸心易斷昆明路如今作吏低兩眉局促
安有胸中奇慙爲肉食相敢忘布衣時數口長貧三
尺在願言持此報相知

贈程子虛

咄咄東華大帝君天門朗照開人文無端小童歌青

梧六合靈氣相氤氲幻出才子大崩奔使我耳目零
亂如秋雲眼前一一南海珠筆端總寫金芙蓉意氣
長林風葉踈日爲諸公輟簿書我才不足情有餘門
外何來程子虛手驅煙月黃山偶相看共剪西窓燭
大池星滿挂空綠更兼吳士慘舴艋好取天河瀉醺
醺夜深雄談落神颺猛虎欲到風蕭蕭自拚山店爲
官舍况借疎鐘答海潮嗟余墮地幾四十頭顱短去
劍花澁鐘鼎富貴我不愛竹帛修名幾時立不如早
與公等尋一丘瑤草瓊枝等閑拾五岳四瀆真可期

金女木公定長揖

贈湯慈明

春風五雨凌滄洲水紋漲綠沙如丘王睢鼓翼澤羅
遊絲絲楊柳覆船頭夜涼簫管咽中流王孫新抱靡
蕪愁自言爲客敝貂裘登艫酌酒海欲曙絳河銀燭
天疑秋今夕何夕得同舟美人若霞舉家在蕪
城舊禁籞牙旗十萬羽林兒錦纜三千殿脚女月明
鳳下憶吹簫火照烏栖驚列炬六代風華此擅場花
牋秀句應堪數歌鐘撲地連香塵樓堞臨江弄煙雨

有時立馬看狼山與到乘橈泛牛渚以茲綵筆太紛
紜瓜步靈潮建業雲鮑昭才盡江淹歿南國詞人今
到君君才千秋足玄賞落落高情復雲上十年相望
白鷗汀一旦追隨青雀舫酒中累月見情真行吟散
髮惜餘春芳草時時能媚客桃花步步可憐人最喜
天涯遇良友更得茹生若瓊玖齊塞杜若過橋邊共
醉蒹葭宿浦口嗟余博物愧司空吐氣安能占北斗
昔去無將匹馬送今來似挾雙龍吼

送丁右武侍御謫潞安司理迎母南還

豫章先生衝冠士白簡青驄柱下史然諾片語向客
傾生平寸心爲人死神馬騰驤蒲類寒寶刀颯沓妖
虹紫上書大叫天門邊風馳電擊龍蜿蜒一官謫去
非其罪獵纓西笑浮雲前馬頭不覽中條色杖底且
拂香爐煙心知聶政尚有母昂藏七尺未可捐繡衣
脫却披萊綵親製雲謠登舞筵孤帆海月橫空笛兩
岼江花下瀨船羨君此行亦足快五嶽當胸隱磊塊
古來英雄得道人匿跡收聲發靈籟不見高天霹靂
飛湏臾雲盡虛空在

鄒舍人歌

朱樓大道連城闔楊花撲鞍雨洗塵西山紅霞落日
晚馬上相逢鄒舍人舍人少年楚才子自言家住瀟
湘水夢澤魚龍枕簟中衡巖雲霧牕楹裏六尺文弱
意氣麤兩眼睥睨空萬夫讀書爲文有神力星辰岳
瀆毫端翹口吹西王白玉琯手探南浦紅珊瑚元氣
淋漓爛天藻萬里雲霄致身早藜火踈星齋閣涼蘭
膏殘月華清曉山川大國青黛多旌旗羽獵荆王過
一帶微波沒漢女千秋斑竹哀湘娥所以荆人競雙

舉跌宕聲流轉淒楚風急天空野鶴來江翻海立妖
蛟舞平生不愛塵網牽焚香約友謀清緣語罷上行
脩竹下醉來小臥落花前看君落穆真吾下快意風
流得心賞區區九州不足遊相期七十二峰上

董逃篇

君不見董逃風昔縱橫年隻手障日力回天揮霍山
河在指臂片言睡毗死道邊公子聯鑣金馬下豪奴
使酒朱樓前一朝富貴掩灰土鍾乳胡椒入天府銅
雀摧頽吼夜風石馬荒涼卧秋雨又不見貂璫自侍

君王側玉帶朱衣藉恩澤口中白日生風雲掌上青
天飛霹靂空憐壯士輪頭顱但與宵人借羽翼燭然
滄桑世事翻龍蛇窟壞狐鼠奔主恩猶待以不灰匹
馬蕭蕭出國門吁嗟乎霍氏之禍驂乘始梁冀事敗
秦宮死古來姦雄總如此吐氣衝虹霓拔劍斫海水
坐令六合氛霾開天清地晶露泚泚壯哉批龍鱗不
異履虎尾誰爲千秋人江李二御史

採花涇篇贈徐文卿

採花涇上花事繁王睢鼓翼倉庚喧南國明璫交雜

佩西園公子開酒尊沙棠之舟木蘭槳微風淥水橫
塘上羅衣香裏寶扇搖玉遂聲中暗波響陸家兄弟
傾吳都空青水碧世所無屬鴉一隻雪皓晶鴛鴦七
十煙模糊美人蕭條黃耳去月冷花殘海空曙堤邊
不見蕩槳人浦口猶餘採花處千秋秀色平原村只
今惟有偃王孫偃王孫子美白皙少年才氣何翩翩
翻枝枝璚藥真無價朵朵芙蓉信可餐京路風塵馬蹄
緩與君送日南雲滿今年雪凍邊氣深來歲花開水
痕暖可憐開時不在家何由擊楫卧空沙石瀨猶疑

聽清吹衣裳曾得染明霞青山一出是紅塵進賢寧
似華陽巾相將頭白始歸去五湖荷花笑煞人

贈吳生

嗟嗟吳生流落居人下四十年前騎駿馬風塵失意
何足憐一日持杯一蕭灑金谷園中花滿路眼前一
成香泥古來得失都如此酒後花深鸞亂啼

君不見

君不見上有上帝貴下有后土尊百神列宿相擁衛
五嶽四瀆還崩奔元氣何淋漓大化總委謝日月朝

從滄海升星河夜向天門挂六合之內何所爲六合
之外君豈知井中碧落逗一線開口談天紛如庖膳
白鵝雛嚇腐鼠鳩輕鵬鳥嘲天池朝生暮死亦何有
無乃翻爲達者嗤君不見雷霆響烈烈蜩螗聲唧唧
撞鐘泰山頂况乃罡風道揚帆涉滄海安得有細流
巨跡踏入荒大語驚千秋庸夫無遠心曠士多高韻
太息擾擾者終作朝菌盡寧爲神理責不受世俗嗔
趨時在得意所樂須及身烹羊飲美酒一醉蛾眉人
時來且富貴歟去當灰塵所以古人好雲壑不與區

區世人角谿面閑看碧浪生峰頭笑引丹霞落光陰
駛如楫世事俱電露萬物無不壞一官豈常住乞身
我有青山歸君到歸時向何處君今笑我愚且駭我
亦哀君喚不回試看牛羊秋草裏舊時金往與銅臺

贈吳山人昌齡

吳山人佳公子瘦骨清眉舌如綺三十瀟瀟老禿翁
一身落拓乾坤裏華屋朱門賣與人窮巷蓬蒿而已
矣門前獨枕大江流江上青山晚來紫彈琴應曲往
往精近日新詩滿人耳面帶煙霞相合貧布袍補帽

無風塵更有清言堪絕倒高譚揮塵空四鄰座無君
卿客不樂安車爭欲迎山人耽玄好道自言尊繁華
剝盡見天根前身頭陀無乃是灰心直欲投空門空
門歲月眇萬劫世事蒼茫等秋葉余亦當今學道人
繡佛齋前片語合君爲布衣真自雄我雖有官轉眼
空一瓢一笠無不可胡爲齷齪居樊籠嗚呼胡爲齷
齷居樊籠黃鵠太叫玄鶴冲與爾歸去青山中

送楊漢卿之金陵兼柬馮咸甫

金陵之山鬱岌堯驛路清霜明板橋長帆大編日來

往江上潮聲送六朝六朝送盡秋霧白銀鞍寶馬俱
蕭條我昔南中夢來久羨君今日登牛首細雨斜陽
萬寺鐘啼鴉曉月千門柳此時楊生策蹇驢踏花夜
出秦淮口秦淮口多酒樓酒樓簾捲珊瑚鈎雕簷低
覆紅恩不美人二人彈箜篌箜篌新聲佳且麗淥水
娟娟轉白苧櫻桃樹下門巷深思君望君宿何處雲
間馮生爾故人相逢共醉壚頭春風吹騶馬人如玉
雨洗天街香作塵愧我頭顱今老大流水無情白
謝青山解得笑王孫空負秦淮明月夜秦淮明月白

紛紛一片晴湖沒彩雲
因人更作金陵夢
霜落未歸
好送君

金生歌

金生才氣傾吳都
短小白皙美丈夫
少年覽古破万卷
魚龍灑潑吞五湖
谿上沙明見神女
江邊劍冷啼
專諸竭來西山醉
落日酒態淋漓坐
超忽呼盧浮白
花氣深擎琉璃棹
月華出咿嚶
不肯傍王侯
香奩
中有傲骨一語落落便拂衣
何處青山不可歸
千金
錦上能辭賞
一箭聊城堪解圍
嗟余與爾本同調
却

破微官苦相勦生使英雄如檻猿
齷齪低眉向人笑
今我何爲馬上塵相期共理湖中櫂

贈朱汝修

下蔡佳人何婉孌家在河南多隴阪
劉安好文復好道手招八公開僊館
山上井竈今猶存雲中雞犬去不返
玉珥聲送青桂疎金枝堆冷白日晚
佳人携家亦北遊飛沙積雪古幽州
少年讀書有遠韻高言落筆鏘琳球
枕中鴻寶煙霞繞肘後金丹沆瀣浮
入山採藥逢樵牧有時綰胸交玉侯
香鑪茗椀夜寂莫名

花簪竹客淹惡飛觥援簡窮勝事海色東曙河西流
直欲淋漓破萬卷安能鹵莽營千秋余本野客卧雲
霧偶來作吏舍香署與君相見即相投數過開尊坐
嘉樹司空望氣知劔埋太史占天奏星聚愧無玄草
示侯芭但喜清芬對叔度一登廣武歎英雄再讀靈
光失辭賦君猶白雪競高歌余已青山領深趣相期
還訪濠梁翁戲踏靈峰紫煙去

贈周生還吳興

周郎嫣然性落穆身世輕風載黃鵠生來家本蝦蟆

陵作客今依龍子國少年警敏多執事擊劒弄花風
雨速朝驅腰褭出東郊夜倚筵侯醉華屋月下曾觀
神母碁花間戲共仙人博竭來燕丘何徜徉燕姬酒
肆客疎狂黑水灣前懷督亢黃金臺下哭昭王天荒
涿鹿鞦韆架日落盧龍蹴踘場大將旗開掣黃霧匹
馬又向雲中去邊氣寒深金僕姑角聲吹老丁都護
馬蹄踏穿筋力微飄然便指五湖滄清秋蕩漾月積
浦薄暮回船水濕衣

中秋燕郭舜舉兵部宅

中秋夜醉令公家更深雲盡月吐華座客半是五陵
俠邊風不動天無沙妖童新度梁州曲豪士自鼓漁
陽搗滿庭玉露桂花冷金杯盡入山河影六街如水
爽氣空疑在長湖三萬頃殘螢數點媚秋衣變宮流
徵娛清輝何人拔劒忽起舞英雄猛氣橫金微大星
兩落北斗亂眼看百道虹光飛郭夫子何瀟灑一夕
風波尊俎中十年飄泊邊垂下歸來髮短雄心存猶
是當時和歌者世事閱盡浮雲輕榮華飄忽流電驚
稱名鬪智取大利意氣千秋莽未平銅臺上食亦何

用金谷草荒寒露生以茲感歎增慨慷白骨不到空
名香明月既在天美酒復盈觴何物螺贏何物侯王
丈夫眉頭無日不揚人間火宅那可住倒翻銀漢滌
清涼

題玉芝館

洞門蕭蕭靈雨響窓前一夜青芝長空簾不動香出
花瞳矓旭日開明霞主人燕坐白雲墮客去猶復鳴
箏坐青谿寒溜通平池落花數點竹千箇

贈董玉几山人

玉几山人家越絕石帆秦望參差列
竭來燕市一
年杖底煙雪護雙闕蓬累朱門浩蕩行子雲筆札
卿舌案上長披東觀書欄前半落西山月抽毫授簡
青尊賒擊筑彈碁白日斜居貧不受灌夫罵結客曾
過朱方家好古耽奇工薤粟蒼亟黯澹神靈哭赤雀
銜來玉簡文玄夷捧出金田錄巨碣魚龍沒水求大
碑風雨摩崖讀向來此物知有神蒼頡史籀俱灰塵
銀爲不律鐵作限董君大雅今無倫禹穴蘭亭日在
眼勸君莫老長生春玉洞丹霞堪杖策桃花野水待

垂綸

黃山山人歌贈吳孝甫

黃山山人吳孝甫風情蕭散復豪舉少年結屋向崑
間前有熊熊後猛虎采芝長嘯歸來遲流雲滿牀月
當戶高松蒼蒼含古色一一峯雲攬河鼓阮谷窈窕
藤蘿閒慘澹精靈夜深語男兒寧肯老一丘杖策終
然走吳楚卽今攜家住廣陵大扁乘桴弄煙雨世間
日月如轉蓬荒陬大呌黃山空昔年取醉長干里金
裝寶馬珊瑚紅歌舞倡樓極妙麗結交酒肆多英雄

五嶽都來雙足下千秋總盡一杯中男兒生不封侯
佩朱紱布衣放浪吾願畢當胸磊塊不自銷往往跌
宕見英物萬事脫手應翛然不爲仙人卽爲佛不仙
不佛卽亦得生時飲酒死埋骨丈夫踪跡廓落有如
此八紘湫隘如篝羅三十六峰回首堆青螺排風騎
氣差足多黃山黃山奈爾何

白榆集卷之三終